

Ûn sco ingün – il famus Cla Famos

In film dad Arnold Rauch

■ **(anr/fa) Cla Famos, hotelier, affarist, chatschader ed iniziand da l'Acla da Fans festivescha quest onn ses 80avel anniversari. A la TvR ha'l quintà in pèr da sias istorgias e mussà er nua ch'el ha ses refugi.** «Sch'ins abita en l'Engiadina Bassa fan ins baud u tard l'enconuschientscha da l'original *Cla Famos*», di *Arnold Rauch* che lavura tar la Televisiun Rumantscha TvR, «ed ins vegn er confruntà cun sias istorgias ch'el quinta.» La dumonda, sch'ellas èn vaira u betg, nun è tenor il cineast gnanc uschè decisiva: Tenor el èsi in giudiment ad udir cun quant fiu che Cla Famos las quinta. «E cun far il film hai jau fatg l'experiencescha ch'il fil cotschen è adina il medem, mo la maniera co ch'el embellescha las istorgias variescha in zic», agiunscha Arnold Rauch. L'aspectatur bada immediat ch'il cineast ed il purtretà fan buna farina l'in cun l'auter.

Passentà l'uffanza a Raschvella

Il film entschaiva a Raschvella, ina pitschna fracziun da Ramosch, nua che Cla Famos passenta bler temp. El demonstrescha ad Arnold Rauch co ch'ins chargia sia trapla d'urs. «Be el posseda ina tala trapla da l'urs», manegia il cineast, «e precis uschè unic sco sia trapla è er sia vita.» Cla Famos è naschì il mars da l'onn 1924 a Foggia en Italia. Ses geniturs Leta ed Anton manavan en quella citad en la Puglia la «Pasticeria Svizzera». A Foggia

era Cla però savens malsau: «Ils conturns da la citad eran da quel temp palidus, e probablamain na faschevan ils tissis che vegnivan squitads cunter la malaria uschè bain a mia sanadad», suppona Cla da Foggia, sco ch'el vegn numnà en Engiadina Bassa. Perquai è el creschì si a Raschvella tar sia nona e ses non. Ensemen cun il team da la TvR ha visità Cla Famos la citad Foggia. El mussa nua ch'era la pastizeria da ses geniturs: Ch'i saja trist a vesair co che tut s'haja midà ed a sa regurdar a temps passads, di Cla da Foggia.

Grond success cun in'idea «strana»

Suenter la guerra lavura'l in pèr onns en differents hotels a Turitg ed a Londra e pli tard surpiglia'l in hotel en Spagna. Turnà en patria maina el durant blers onns l'Hotel da la Posta a Martina. Dal 1960 marida'l Lillian Decar-

ro da Genevra ed ha cun ella trais uffants, Anton, Urezza e Martina. «Avant prest ventg onns ha gi Cla da Foggia l'idea geniala d'avrir in tancadi cun butia en la zona da dazi liber, sin territori dal cumin da Tschlin», quinta Arnold Rauch, «e causa che l'Acla da Fans sa chatta in pulit toc avant Samignun ha'l gi grond success cun sia idea che blers avevan numnà a l'entschatta strana.»

A la fin dal 2003 venda Cla Famos tut sias acczias da l'Acla da Fans inclus il Hotel Engiadina a Martina. Ch'el possia viver uss in zic pli patgific, di Arnold Rauch, «i dat adina da zambregiar insatge, u a Scuol nua ch'el abita cun sia dunna Lillian, u en ses refugi a Raschvella nua ch'el ha passentà sia uffanza.

Datas d'emissiun: dumengia, ils 29-02-04, 17.00 sin SF 1; sonda, ils 06-03-04, 11.40 sin SF1 e dumengia, ils 07-03-04, 07.45 sin TSI 1.

In'emna pli tard causa «MusicStar»

Il film «Ûn sco ingün» è in product da lavur da team: L'autur è Arnold Rauch, respunsabel per la camera e per il tagl era *Dirk Adalbert Frenkel*. Per il tun ha pesserà *Markus Graber* e *Conrad Schlosser* per la sonorizaziun. Il schef da redacziun era *Mariano Tschuor* e l'assistenta da redacziun *Claudine Cavegn*. Il film

che cuzza 26 minutas è ina produziun da la Televisiun Rumantscha. Previs era stà d'emetter il film gia la dumengia, ils 22 da favrer 2004. Ma causa ch'il star indigen *Mario Pacchioli* è arrivà en il final da MusicStar han ins reservà il temp d'emissiun da proxima dumengia per il rapport da quella concorrenza.



En il film dal cineast Arnold Rauch (san.) quinta Cla Famos tranter auter er l'ina u l'autra istorgia da chatscha.